





素翁續集卷八

男達編輯 姪孫大黼校刊

序

贈朱三峯興化郡伯序

夫聚方分類川精嶽氣殆有所主持其間嘗觀夫越臨觀之美甲天下閩山澤通氣以鍾之於人方格重有異者而封連壤接閩與越交事樞前政之翁張舊德之薰習副目觀而酬心寄若東西家然率未有見夫純一其趨以會歸其至然則化而齊其皆虛語歟嘉靖癸未莆之守擢去朱君朝章代之君瓌衷藻質明習法比時方以憲部正郎為



卿長慎擇奉 天子命慮囚于蜀同官者曰朝章宣 皇  
仁為寃人寄命輟而莆孰若聽畢事于蜀惠深且廣哉君  
進士久敷歷中外綽有聲稱滯以收將殊而大之也僅之  
郡乎承譬諸作室斷連抱而小之非材宜余曰朝章其不  
薄守也方千里而郡寄之民父母之有惠施之政有威肅  
之令手提乳保謀其所愛惡而舍施之使官無頗政邑無  
冒吏而鄉無暴民人人乎士君子之行斯之謂民之父母  
否將疾而仇視之是固民之無良亦豈守之利哉郡藩臬  
之寄藩臬臺省之寄朝章清才卓識其誰不與之鬱而使  
伸宰物者大其至也夫郡有所事有所使有所專亦有所  
不得徑遂者事樞政理物情人態以日焚吾前拂其心以  
平其氣落之華以收之於實相濟非相病也涉川者貴有  
待行千里者遲亦至徒取快疾然哉抑仕有學道焉取以  
自益亦取為人之益通宏厥之性以無情幽澹涼寂之情  
莆君之所也莆前守績學功事赫赫動人耳目有岳公季  
方潘公舜絃王公存敬繼之者或弗似張公時峻視莆復  
之未久謝去嗣是或因或復口碑尚存君力副焉莆將賀  
得君君亦自賀得莆蒙臬俎豆之間有公席焉淹速鈍利  
知理道者之所無計也

風山先生遺文序



身... 卷八  
月  
二

文本諸心而根之於道主張人文鋪敘皇極感人心而裨  
治化後世抉竒搜博以績藻雕飾為工文云文云乎哉太  
子太保尚書章文懿公風山先生自魁禮部系仕籍幾六  
十年實歷不滿三載甘貧守道崇尚廉退其忠實之操質  
約渾古之風固已高出人流望在海之內外經世大略大  
可用天下小可用於天下而石蘊淵藏僅取司成之一遇  
棄之壯盛而收之衰憊之餘斯有志所扼腕也然士有山  
斗國有著龜以繫獨天下之重尊信大同焉及請老勤複  
武廟重違其意加其官竟許之上在舊邸孰先生名作而  
即位思有以致之先生已望九之年縵典殊恩其不能拜

矣余愧屈數老於先生尤注嚮先生亦謬余與時屬有所  
寄遺老之召方幸過里門接道論而先生又歿矣老泪遺  
容幽明相對余之無能已先生猶先生之無能已于余也  
既狀事行與立祠門人董遵以遺文屬序先生全集諸子  
都憲君拯以梓行矣是集得意作也先生專志六經附博  
史子意所詣極將欲起發學數百年後會北山魯齋仁山  
白雲之派以上接晦菴東萊之傳次之亦力追道傳晉卿  
景濂仲申數大家之逸響其旨深深可寓道其詞正正可  
寓心其筆勢平典文理簡潔卒澤於道德仁義粹如若湖  
海平流風激水湧以備盡文章變態文云文云乎哉



端本策敘

贈宮保尚書李公秀實司教漢中上端本十六策 仁廟  
讀之喜將用之驛召而至 上上賓 宣廟試之効授以  
司諫尋轉左又將用之公卒年三十七有遺寄焉昔東波  
上皇帝書柔行巽入識者謂其得告君之體夫諫有正有  
諷籌義理量事勢直言讜議是之謂正而巧發潛運是之  
謂諷孔子論五諫曰吾其從諷諫乎意非孔子之言也人  
臣事君盡其在我聽不聽天也正焉有不利者哉夫法語  
正也巽言婉而道不出乎正者也王斗正諫齊宣舉士鮑  
叔直對齊桓不敢鑄鍾以昭名茅焦解衣伏質而始皇母

子如初諷微出乎正而終歸乎正者也東方朔名善諷諫  
時進直言武帝猶俳優畜之所謂勸百風一君子有弗取  
焉爾公之策非所謂正諫者乎余獨慕二聖之善處公也  
唐太宗謂高宗曰汝於李勣無恩我今出之汝立以為僕  
射宋太祖得齊賢不欲爵以官陰屬太宗異時用為相夫  
為子擇人義不當如是孰若 仁廟知公收之勤宣廟試  
公用之異誠乎意感正大明白為聖子神孫法程使守以  
無失將夔龍滿朝都俞世世堯舜之治引之於無窮不難  
矣追惜者公有時無命策不盡見於行然繼之有孫克嗣  
君忠亮典則位宮保長夏卿叅留務為 聖心倚注 宗



杜根本委重位遇所極公之行在此矣

林文安公文集敘

文根諸理發諸氣而昌之以詞賁飾從施真質猶故迨從  
橫之習勝而渾重澹雅之體衰至搃提仁義而絕滅之貞  
元啓會大音載完起息興衰道隆替與焉漢之盛司馬子  
長以豪健鳴唐之盛昌黎退之以雄深鳴宋之盛歐陽永  
叔以雅潔鳴同時班柳蘇王聯聲遠響名名家嗣是作者  
日衆詞徒長而氣以弱理亦為之晦甚至駢駕才華搜竒  
捕怪樸以采紛雅以俗亂藻製瓌調未必不足譁世而冒  
名而稽諸典謨訓誥遠矣國朝承胡元之弊力挽古風潛

溪倡之東里和之作者之盛要亦不讓前觀太子太保文  
安公泉山先生生宣德甲寅去醇樸未遠又居川嶽形要  
之會漸涵撫州尚書公之名訓起進士入翰林積官吏兵  
尚書參其留務中有餘養而出有餘用歲明於晦戢介於  
柔恢恢然有容而陽秋內寘不可卒近完名盛福多孫子  
壽八十六以終諸大老無及焉評者謂有韓范之遇萬石  
陽城族里之化文富洛社之風雅殆然者先生文平氣順  
而一根於理謹質學子固澄練學仲仲而氣度暇整動應  
繩墨如輕縑便體嘉穀之濟實用逮其變也如立峯壯雲  
平流之隱細浪可以觀人可以觀世其姻族後行先生嘗



曰迂老之文吾見素敘之抑縮以久仲子藩伯君利瞻將  
鋟梓以傳以書來速叔風弗似銳欲參几杖以式餘年先  
生不可起某亦頽然老以病方槩盛節可慕而不可學也  
謹附名集間酬宿命云爾

### 莆陽文獻序

莆文物起於隋興於唐而尤盛宋海濱鄒魯至今焉而紀  
述遺闕紹熙時始有軍志洪武時始有事述郡志弘治時  
也文獻之修尚闕千百年光嶽之氣彙鍾于元人者為道  
德為節槩為勲烈為文章為四儒道學以茂贊 皇猷輝  
發聖蘊如景星卿雲轉瞬而消滅以盡其不深可慨歟然

有其難者夫記誦弗博則搜校漏遺升落無章亦準量決  
擇有未至重以參愛惡其間與欲借隻詞而不遂者則吠  
聲嘵嘵市虎三告故退之不作史子瞻病文選無法而文  
鑑去取亦未憚於晦翁事述郡志同撰自相詆訾文獻之  
筆其未易操也乃以累吾鄭公山齋取立齋手錄參以諸  
家遺文并述志而類萃之人取其尤事取其覈詩文取其  
純整無叛道后峯間商校必東士遠間刪削焉閱數歲始  
克就編屬余為序余未見成書要自公出賢者也三君子  
又賢者也書固足信矣第不知有借隻詞不遂否乎吠聲  
之屬其不謂終無也道也者求諸我爾矣盡不盡吾知之



見素齋集卷八 戶 六  
信不信又胡從而知之司馬遷史記雄向稱良史才子由兄弟獨踈淺病焉抑無害遷也纂輯定監戒昭為甫立赤幟今之視宋猶宋人之視唐人也人文之盛有大書特書不一書者矣

西湖楊氏族譜敘

造化以物群有類諸形族也形分而氣別之類諸氣族也氣引之而無窮則世疏而不可理族之譜可無作乎夫卦謚爵官姓始也系長譜始也姓苑譜諸官氏族譜諸家然以官則略以家則失之附而不可據族之譜可易作乎楊自唐叔虞之後伯僑封楊因楊姓而韋柳楊杜郡姓稱焉

東京楊表並顯而清白家法楊世有人太子中允沙村先生固安西湖之楊出上都興州右姓 國朝從善翁內徙西湖居焉二子曰興曰貴興幾傳而和弟京闈官終代藩左長史贈奉政大夫三家徽嗣家學伯維傑仲維聰先後進士及第伯編修仲修撰晉今秩植節砥行文字不刻意雕篆為工即沙村也季維誠亦業嗣響貴即樹有戰功世為朔州千戶奉政譜從善為始遷之祖繼以太宗興而下凡幾世遷而上闕焉沙村又續別子朔州貴而下凡幾世以系于譜裒輯詰勅銘誌遺文而并附之儒術武勳傳敘有躉楊即不出東京末後東京也沙村屬余為敘夫譜所



身素集卷八 序 七  
可知譜法也歐陽之譜自萬八世其上失詳焉蘇氏之譜  
自沂五世其上失詳焉系所可詳無敢有苟爾矣六一老  
泉殆有矯夫冒妄之混真抑自知其立足為是譜重者夫  
以一人之身分而為千百人之身又合而為一人之心固  
有特出倫類主持綱常為世族型範累葉載德奉政沙村  
百心焉而譜系絕續亦以寓時化之微世責之所留念也

城左鄭氏族譜序

化與道常相因者也身不易道則政不易化世風人紀相  
必由之故族視家家視身潔齊聯屬政通化流如三元布  
氣百靈効於其職而其盛可常其不常其培植滋長要之  
久以定之天如梧櫨然率取材於百年十年近者亦數十  
年雖天時氣數遲速早晚爾殊而堅貞槩特固獨存焉鄭  
自露公兄弟倡學南湖子姓擇地成業梓露四世刺史肇  
徙楓嶺五世倉曹楨徙桃源至提舉朝又徙郡學之傍衣  
冠聯數葉以盛當是時意氣何壯也子司訓子靜三傳而  
為思益又徙府前傳廷輔傳祥官教諭傳洛書起進士為監  
察御史是謂大宗府前房也二支方盛大宗雖晦晦藏戢  
含毓必楨而遺經故在型治隱存閱再世教諭以文行名  
嶺南監察以治行名吳淞獨立敢言名 朝堂橋梓敷榮  
如芝蘭耀日梧竹之拂晴烟二支之子姓後焉夫道恒也



政化易而道無易仁居義由勤植儉守執其恒通其變以致道也故順故亨故久盈虛消長造化者不能違焉故裕以治蠱蠱日深大有而受以謙泰亦有城復于隍之戒記兒時拜司訓容公牀下得思益公容止甚真蓋善處夫冲晦之間謙亨有終君子美能受是宜其有後也序是譜並序其世

壽左司馬山齋鄭公六十詩序

余名好士故而密新而投遠而諧協備正聲而不流俗調如賓陳公山齋鄭公尤余副如賓純孝苦行竟以母老歸母終亦終而孝廉有旌鄉賢有祀潛幽有誅飽育其妻子

有齷固如在如賓也山齋孤格壯猷立方養尚博識而善文如喬嶽具瞻樓船優於負載天下事身任不疑左轄江藩坐忤逆濠意晦處林壑今天子更元嘉靖言者言其忠遂連起中丞廷尉再進左司馬莊而求毅而斷賢問秩秩倫輩上其正位本兵總制西夏中外之心預屬識治亦以為允公期副上知竭盡忠愫以翼正國是而持論不回群陰構煽遂連疏引避貞臣道阻業公留則已山中對服莆野水間矣夫君子去留皆有所甚繫朝著鄉國其敦率均也慶曆聖德之頌曰惟仲淹弼一夔一契天下不以為過司馬君實退居于洛邵堯夫謝聘命相從重厚之



風聞于天下 今天子經理堯舜夔契滿朝余二起亦起歸亦歸則道大致同也空中樓閣余安敢附堯夫而足履實地公無力君實自副哉表律歆發以還莆鄒魯公之後又自有公昔文潞公起平章壽八十一公壽週一甲子 聖天子寤寐耆賢用潞公故事起公于家則 朝廷又復有公而范公江湖負憂富公居家言大利害公無力二公終副哉壽之日冢嗣泓為致賓公紀四詩余和之賓又和之余序之

留餘存稿序

予友陳君留餘蚤以春秋魁天下士宦迹所至有聲世貴將賴焉領覺非之悟行急流之退之勇于艾服官政之年高君者惜其用之弗究為計太以早矣夫二疏之去君子以為燭幾君冥鴻孤引以預脫士夫駢首之禍一作一止而亦豈徒哉近得君留餘存稿讀之為之大快夫富貴勞人孰若貧賤之輕世肆志超物表寄霞外與濫巾竊吹誘松桂而欺猿鶴何如也抑際遇時也績効之建立與有命焉委分行志由之人乎哉組織文字雄情逸思以盡發胸中之竒合溪山雲鳥而指令之與造化爭巧日星爭麗逸流名派爭激昂要亦自有遇者宣力應會間得而破裂之以未必盡如吾意如述作然積于今為烈君孰于斯二者



自我制命用弗究而具則餘功未酬而言則以立留餘其  
居是矣然竊計之投散謝榮激清而鎮躁叔世奇事終懼  
夫斯人之溺而無一引手援也予同年相好出處跡相類  
顧若欠恕于君夫道分與義爾矣無害我之止亦無害為  
君之行義江鷗石之盟遲之今可也請追論之

敘三江翁毛先生別

太子太傅三江毛公以疾疏致禮部尚書以去 上留之  
又疏強之又疏意懇而詞求哀焉 上勞問頗復卒允而  
秩數加焉見素子曰君子之於天下也無介不立易之豫  
其六二曰介於石不終日貞吉夫介如石靜而堅矣動而

無撓吉何如矣無貞不恒易之乾其文言曰貞者事之幹  
也貞可依焉正而固矣立不易方吝何自矣無節則嗟節  
之象其辭曰安節之亨承上道也節不逾焉順而正矣柔  
之得中厲無門矣毛公蓋兼有焉夫正德之際豪猾鼓焰  
時也赳赳噓噓附之有光公既不亢亦又不群不掘其泥  
不揚其波豪猾畏而敬之今 上即位剷靡淄濊公獨不  
染介於石公之謂乎翕翕泚泚縮者盡怵公既不激亦又  
不阿不懼其威不同其和豪猾敬而遠之今 上更化搜  
刷垢瑕公獨不與正而固公之本乎 國統中輟 親藩  
入繼建議昌言奉迎護躡 天子嘉焉崇爵顯秩若罔聞



身... 識涎垂競赴公若免焉承上有道公其節哉夫處易移之時有足移之勢而三善不違一德純備予安能無不豫其間者邪夫宗伯者典常之司也典常者教化之源也故三禮之典非夷弗申五教之敷非契不命至治之馨惟宗伯之慶嘉靖中興更張百度惟宗伯是顧以翼以為一臂股乎失予又不能無不豫其間夫公之去疾去也近醫藥節思慮以扶衰起羸師垣之席虛以待公去猶留日也成王之頌曰佛時仔肩視我顯德行斯 皇上訪落戀故之心公念哉

志喜短序

林棲谷隱閨藏屏伏其潛行難章其內美尤不易見一旦孰姓名 天子龍章下錫播士夫歌詠而幽舉之昭前輝揚後懿門不易故而新族里山川居然生色君子徵諸其世開之方秋官思道自取進士樹有宦績分恩父垣菴翁母潘氏配蔣氏皆被有命服方門戶一新族里山川生色焉是孰為之思道也孰先為之翁與先世也譬諸木然其植本固如泉然其蓄源遠頎然其長浩然其流其參天其海誰遏之思道天才迅發海內士幾於無雙述作百年予畏也抑名大者爭亦大容有破我所有而媒孽我以其無直先代甘先竭古固有之君子知微用晦慎引之其參天



其至海何有哉古國成文數十賦始用制其民之其來夫

吳世味必大青年亦大容亦如也而彼其其其

亦本國吹果然其音風表則然其音音然其音天其

且其其之思其山其夫其之食與其其也其其木其

世開之文殊官思自及士樹育官其分思文世其

蘇新禮門不長姑而條楚里山川其然其色其子其

煉技各天子請章才驗蘇士夫煇精而幽舉之即而

林野必其園蘇其外其音其其章其內美文不其長一旦

素翁續集卷九

素翁續集卷九

男達編輯 姪孫大黼校刊

記

文場修建記

國家造育人才招徠髦雋五教虞始三物周始而比士之法周詳焉貢院專設禮部開元始諸省崇寧政和始闈則元祐時也凡四徙三皇廟值焉時闈時飾載革載因明遠樓猶循其舊而道徑紆隘由者病正德庚辰樓燬辛巳大巡汪公嗣按慨然念曰貢院選士明遠樓無謂然哉樓災容有示之意者道徑紆隘何以示士趨哉珊則任之諸司



響和以載新斯樓厚其直闢道直而廣之石而垣木而橋  
材因祠舊而悉化之新不良費而功告成憲使沙公鵬大  
叅宋公冕督學胡公鐸屬記夫進賢上賞王下賢書之拜  
古先帝王為世道重者重士爾矣齊桓之內政漢武之詔  
書猶申五罪三黜為蔽賢深倣方是時士則猶重也易書  
糊名限簾園棘士自是輕矣然元臣貞士恢復版宇奠正  
宗祐而佐理太平皆是乎在宋太祖白衣之論是意也夫  
士自待者正有司待士者公上得真材而士鮮遺用風所  
以復古也近殆有未然者災所以告也而士趨之示大巡  
諸君子意先之夫燬者新隘者闢紆者直兼致其勤為賓  
興之預而告成伊始適值 聖明新天子求人更化釐革  
庶弊之期百司怙怙然恐干吏議諸士奮汎崇正之學重  
有脩諸內者士之重一機也夫得若分失若命得則行失  
則斂而寂如莘野弛張孔門之所授受士之至也蓋有不  
必於行必於傳者矣噫無士也非無遇也廣大巡之意為  
閩士申之是後與事藩為公書公臬公錫公繼文公祭臬  
為公昭公珊公珍公禮公昂都閩公欽公翺郡公鐸暨朴  
暨令若某在焉

立齋記

自余去京師四十年始得遡濟寧取道闕里夫子廟叅謁



馬時衍聖公成庵侍 上幸太學季氏翰林五經博士立齋知節主余良勤禮恭而意乎至余曰信夫子後也既別屬記立齋余拾餘潤夫子記謂宜初聖公偕先生名出先聖公南溪翁自命其命字與號皆出西涯李文正公說以告皆夫子語也余焉敢外夫子為告哉禮有本有文立焉所以自固而中正莊敬檢外坊內無辭費無色慢無愆于儀直而行曲而殺經而等以理七情明十義脩睦崇讓以備禮也故曰立曰無以立夫子蓋申言之以明示教戒而交神宿戒又禮之所有事成庵既以世嫡襲公主祀夫子立齋亦以世介襲官主述聖公書院之祀其所以求諸陰求諸陽其在彼其在此亦安得不自立存事之誠洞洞其敬勿勿其欲饗祖祀六十世如生之日耶抑立天立地立人之道曰陰與陽剛與柔仁與義皆夫子所謂之而德功言之立雖雜出老子而無畔於夫子立齋不自尚其世不自大其身居約處厚劬書若學子然吾見其崇德致用脩辭而立誠極其至叅三才而兩斯立之成孔庭訓家法也作立齋記

他石記

玉與石族同而質異有居於至美有居於至惡性不相近則勢不相能而其實足以相濟君子貴玉賤珉玉非石類



也然亦有待於石夫二美相攻難為力而以石攻玉顧以易效其硬性麤質殆非玉之能堪也而日礪月錯求之既深而責之務以完琢磨砥礪無所不至夫然後瑕疵盡去本真自如而玉為成玉其苦之固愛而忠之也詩曰他山之石可以攻玉石玉之幸也族子時獻問別號於余時獻余博士兄贈侍御公季子名與字皆玉義時獻其再字也為號他石它石在諸子尤為博士公慰意為鄉族所寄重始教博士公而終教於我也殆所謂玉攻王者然亦亞鄉魁第有進士其後為郡推為御史物情人態日焚吾前其硬性難調麤質之不可犯深求備責益重有所不堪焉者而琢磨砥礪動心忍性以有茲器完潤而澤縝密而栗固不為所值幸耶抑為玉嘒之均之玉也而剛足而連城為遇固多其不遇亦不為少矣玉誠安之藏璞蘊石方幸伏匿於崇山邃谷之中與天壤俱存遇非玉好也君子懷美不售獨它石然哉獨它石然哉予獨為失玉唁爾作他石記

水竹記

松水國也松江之西白龍洞之右若漚而前顧戀而不忍去以環繞是丘又見夫二雲北峙九峰南揖以得山之勝焉朱君朝和水竹之居遺山而取水水近也取諸竹因所



有也近則名有則又名無謂取乎哉水清也竹亦清也有相須之益焉其流也喻道其止也喻心易風行水上渙以喻文也而蘇枯澤涸又可喻政折而必東也可以喻勇於水取焉爾君子於竹擬德其根固固以立本其幹直直以居貞其節堅堅以明志中虛也可以語量文武兼濟也可以語材一軒養靜於風踈雨碧之左圖右書闡闡謝絕星光月彩布散于水天之下上而時花候鳥効職其前心與天遊景與神會遠峰斷靄歛有而歛無者吾惡乎寄之而水竹固在吾寄不孤澤當時憲來世麗澤擬德之所成就豈必親賢友益然後為至哉抑取諸人大也君子用其大

愛日堂記

臨江領邑喻為最喻諸山蒙秀特為最循其麓一望平衍水紆徐磬折其間有稻田麥畦桑野之利步溪也黎世居之勤力嗇施故族多厚贏以與瑞接也瑞數盜步溪易誨盜固沃壤非安壤也正德庚午今憲伯乾德念齋相城之西隅負章山臨巨浸漆桐松檟歲翳蒙密猶蒙山也菱芡芡蒲蓼荷葦而盛猶則步溪也而絃誦紳冕文物具觀壤固安尤里仁之澤也考極攻位而堂于其中以奉母太孺人愛日所以寄也方太孺人棄御史翁念齋稱孤甚少太孺人柏舟自矢以鞠以教有前日斯其有今日也愛日其



猶前太孺人之心乎夫均之日也有異其長有虞乎其短情與境異爾愛子之日其朏明其旦明其隅中其正中乎是之謂長及時而進湏時焉以出一愛也愛親其小還其大還其高春其下春之日乎是之謂短年日以高則其衰日以近是謂日昃之離其惡得而久之斯一愛也人子之心其有窮乎哉念齋起進士為名御史太孺人膺有封命有今日由其有前日也及是念齋有廣臬之赴取道寧母官之養其不可迎也衝衝然不以自定記愛日取志養祿養解之夫致其樂又致其榮雖不日親側視敝敝荒瘠取菽水兒啼烏弄顏膝間蓋亦末矣抑古者寸陰是競懼來日之無多而日之積也不厚則其負巨任也無力而象賢濟美又慨夫黎之來日之不今日也則均斯堂之惠黎世訓可也

刑陝西部題名記

刑部尚書周秋官卿也漢而下曰三公曹三公都官秋官尚書大司寇大常伯唐制尚書一人正三品上侍郎一人正四品上其屬曰憲部比部都官部司門部部郎中一人從五品上下大夫也負外郎一人或二人從六品上上士也主事二人或四人從九品開元陞為八品宋尚書掌刑獄之政而分治于侍郎郎中負外郎元分掌于令史而長



于尚書 國朝中書省既革陞尚書品正二左右侍郎品  
正二改四屬為十二部又為十二清吏司司郎中一人正  
五品員外郎一人從五品主事或三人四人正六品未樂  
改北平司為北京司北平司革增雲南貴州交趾三司交  
趾司革定為今十三司析府部諸司兼理之循憲比都官  
之任而司門屬之司馬其始惜薪司權置謂之行在既定  
鼎南加南京而北去行在今部正統辛酉建也屬既專官  
以各程其職無情失無獄留無奸容無怨斂體仁質義而  
三事脩之五疵去之以敬刑端範坊違而軌物副清吏司  
以贊司寇以質成于天子而又相資仕學部稱小翰林若  
何文肅彭惠安張莊簡孫忠烈今彭幸庵諸公文行燕茂  
副貞並偉者也陝西司文物和會成化間劉德輝王民望  
楊志仁柳拱之暨予一時寅協張應奎劉承華崔應宿董  
萬英舒楚瞻陳禹學後先並起若曹時中純行陳一夔詩  
名又不在位遇間題名卜從大任記輟以有今蔣原學柴  
季常始歸記于予轉瞬四十年人移物換予安恃久存題  
名古多壁記今以石石不朽予安恃自恕諸君子商焉

科續題名記

古公署崇階末秩皆有紀以表年系名連遞代而極於廳  
事曰廳壁記石曰題名記義一也刑部長貳十三屬以典



身素純真卷九  
司邦禁慎重民命弼教期治質獄成于天子章奏之煩視  
他部乎倍夫元戎書記出自辟以俟命于上刑惟長自擇  
主事之負文事習典故端慎者為之或二人或三人遷則  
代謂之本科長貳恃若肘臂正若副腹心焉在是選者惴  
惴然涉深涉濫涉縱涉踈漏干吏議為部若司之辱以取  
自副然自十數公而後容未盡然者甚矣人才之難也抑  
擇固有類亦有所循習以然可以知人可以知長可以知  
世孔氏春秋義例也科題名石已盈續石周于岐戴時亮  
葛仁甫諸賢請記

冰磔軒記

寓懷山石雲鳥花竹之勝固有留於物者矣物留則心去  
心去則物不能以終留君子省克之功其玩適已邪取諸  
類以自益爾安成自衡山臂支昂之為武功延亘百餘里  
至瀘江而縮謂之蒙岡王大姓世居山下勲部正郎一卿  
尊甫封主政本茂翁立軒其間枕遠蒼而臨橫碧凡彝銘  
鼎勒山鑿冢刻巖藏壁貯之書無不備致以畢志藏脩積  
于躬以授于其子凡軒之前皆可寄獨取水磔不以物留  
也不物留則心留焉求諸已而已矣夫冰出於水而寒於  
水寒故堅堅則清不能易磔苦寒無適口之味然而已熱  
鎮燥置甘溫於無所用苦寒用焉君子負人國之大任必



立有人國之大木清苦殆所先事飫之嚼之以適道而明志也世固有熱與甘失者未聞寒與苦失者矣抑皆卿公貴人為然山藪韋布無事樞無民責殆若可委道無往不在也蟬蛻埃溘以孤脫區寰苦味冷性風軌有足懷者用以自潔劉道原之不受寒具也用以潔人汪信民教人常咬菜根也用以垂世楊伯起清白為遺累葉載德也翁自潔者潔人者垂世者一卿既循以自潔矣又以潔人又以垂世以充其所大軒世存可也

秦寧廟學遷記

國家人文成化建學立廟以歛才毓賢焉棲之學程之經輔以史子擇師友而礪錯之亦專且習矣又廟吾夫子使瞻拜于下意有所嚮精神命脉有所領會以為要歸夫子終身之師也退而觀所從祀皆學夫子而幾與得其傳及其門私淑而起者世既相後考心蹟于俎豆之間諸子終身之友也可以端尚可以明趣可以正心脩身而運之家國天下以施夫子之所欲為次之亦不失諸子所至廟學之設其豈徒者哉夫學之建自上古已然至周而備秦而廢漢興禮文尚闕武帝時始罷黜百氏表章六經置學官弟子員至唐開元宋慶曆而又大備邵武秦寧之學趙時館所建寧宗慶元時也迄宋迄元逮今風氣銷縮人文未



副有司者常之常故廢邵守潘侯且既修邵三學郡丞武以泰寧廢告侯往觀曰獨廢然哉爐峰非學所也偕戴尹得循而西鷲湖一址舊属于左氏者岡夷水環峰秀連疊若大造而地設則皆曰是為吾道者留夷之鬼焉得當當之者夫子也夷之類焉得居居之者夫子之徒也今天子崇正闢邪諸不在夫子之道者祠毀材可因址可市以承役之小可大闕可完腐可壯晦可飾而顯焉請于大巡徐君州曰可董學邵君銳曰可付之得綱之丞珏簿珏紀之文學傑士賢相之既成大巡簡君霄始按邵侯白之喜属礪石購文方是時候有浙副按使之命具書幣邑博鋌以二生來予老歸良憊新宮有作抑欲為來賢告也夫不易者道必易者數君子不謂數而道固在我求之師友已第一義又况昏惰意氣自安寡陋以與靈山川偶值之符為計盖已左矣遷學有司一時之惠而夫子百世之師探性命之源囿詩書之群深造自得以主張國是維繫民極步諸子而不畔於夫子斯來賢者事亦遷學者至意若徒苟糜學廩玩愒以攘取一階甚至假巾服以雄視其鄉為士祿蠹彼縉者流且將曰是果外形骸以理自勝如吾大顛謹潔不私學博才敏如吾慧禮何崇彼而抑此也為來賢商所以對抑師者責焉



東昌郡城重修記

先王疆理區內夷而居險而守盛民衛國城無復易也唐信軍顯頊始平陽堯始汾陰湯始皆帝者都周而後有王城方城長城郡縣之城皆阻山帶河為固東昌間齊趙魏之間一望平衍無高阻可因土而城淳化始甃而城洪武始高三十有五尺廣視高而殺週則七里而竒池深二丈廣加其一馬門者樓者鋪者堞者釣橋者水門暗門潛洞雲連星布川防而谷以隱流寇連越東郡無敢入城人誦陳侯鏞造始之功繼而修無紀無紀故無誦亦其理然正德乙亥城連湮于水守李侯珏修之嘉靖壬午守葉侯天

球承之議因贖金為費練卒為役而輔以挽夫之美議上撫巡報可許庸申令刻日並修凡費金百者五役者若干而城以完告夫道安不忘危治不忘亂謹先事之防以無遺臨事之悔大順城而環慶無寇衝三受降修突厥不敢踰山而牧馬築與修皆先事者而鄂土善敗易以陶歲無修費後世傳舍視官焉望引而長如此哉而公不涉費民不涉擾東之人可永永賴蓋亦韙矣抑城可觀政政民心也得其心斯得其力金湯不足為固今之政與民相糾結急義効死幾人哉城之修不可緩者斯役所以記也主是役者侯董則范琪相則向正周璠田良皆郡僚謀則武僚



身...  
呂英鄭昌胡清與焉

雪齋記

鄭正郎成昭雪齋自號欲得大書予取雪浪齋贈之蓋坡翁書也翁愛孫知微畫活水極其變態為之銘書雪浪齋其上刻在輔郡而傳之四方雪齋取義要不在此書之妙殆無出于此也夫雪白之至雪而浪又文之至成昭坐一室雲意護暖寒聲啓嚴始迺淅淅然脉脉然既乃霏霏然盈盈然天空鳥盡四境俱白隱然置身于冰玉之上亦清而極矣而噫氣時發微颺載揚玉屑飄浮縞紋細縐亦奇而極矣物采不留真稅自動其純如繳如者如此雪齋白以明志寄素文于飛閃流晃之間誰得而緇又誰得而闕之夫孫康氏之映資夫雪者也游楊氏之立志夫雪者也子卿氏之不易節邵公氏之不十人又安夫雪者也而霸橋寄興兔園授簡胡為者邪抑靜有動之機雪寒之為雨之化也故與雨同功然時則瑞過則災猶之雨然時則霖過則沴雪齋時而出之為民物造歲黃竹負薪其感固已淺矣

上杭縣廟學遷建記

澤官之制古者擇國中勝地築宮陂水為居業行禮之處掌以三老故士知自重相師成德相觀成性相勵成之學



望一鄉而名天下天下望治焉故曰學校賢士所關教化  
 本源後世殆有苟焉爾苟則因因則士弛毅然自振者幾  
 人哉汀之上杭廟學宋乾道始建縣東也嘉定再建又東  
 嗣是修建徒勞訖無寧歲地卑而水禍數也嘉靖癸未憲  
 伯王君俊民主遷偕侍御丘君道隆相鎮龍吉址擇才授  
 事尹謝侯思本復侵地拓新基尹王侯世熙職其遷事禦  
 丞簿文學相焉董以郡乘楊侯太古而議可于簡君霄徐  
 君州大巡也贊以邵君銳督學也僦工慮材盡淫祠之故  
 與市址之有隱若驅淫鬼以與吾從事未足補以贏位序  
 顯嚴景象麗壯崇正而闢邪寓焉既成屬丁文學冕請記

夫士之於學猶農之於田農終歲勤動不若士安且習也  
 而稽其所至士之得道殆不若農之得歲蓋彼為一家計  
 而七為天下計其公異爾私則專公則泛故雖舍焉與  
 不有是學之學聖人之道者哉昔者莘耕岩築  
 起而為師師遺才商學造士而子方干木吳  
 起禽猾犖之徒再傳弟子無背師說有能道者學  
 將安折衷乎學也廟與學也者器也舍道而求諸  
 器末矣然歆發感動幾有神而化之之道閩蜀鄒魯歸  
 美興學潮士文行本於擇師斯憲伯所為杭士倡也



抑新學而不新士則猶學也發聖儒之響以茂樹伊傳  
為烈予海內士均望杭先告焉

三南記

少傅楊公遂庵起神童弘抱絕誠窮極玄奧為四方學者  
宗師望薦紳而名夷夏公厚予幾五十年常曰知己惟西  
涯已乃見素嗚呼予敢當公之辱哉卯橋倡和謂予曰三  
南為我記焉公世家寧川滇南也僑寓武陵湖南也真居  
京口又江南也故曰三南大岷崙為天下山川之祖南條  
汀漢北條大河山水盡之矣而導江於岷導漢於嶓冢滇  
梁屬隴梁界滇太華諸山昆明諸水相引以入于江而漢

之兩源自合州漢陽與江乎合滇得其上矣滙而洞庭楚  
得其大矣趨而孟瀆入于海吳得其歸宿之處矣得其上  
得其大又得其歸宿之處南滌之境收拾無餘矣而宦迹  
所至殆北滌而盡昔子長山水之助徒寄文字之間子美  
忠不自見三高徒紀窮落之寓夫體用偏勝君子不謂學  
而體道於物流止盈宿是之取爾矣山行水以馴水也高  
則竭滇池通海紫海皆穴洩以留水也卑則疾灩澦滄州  
君山孤山金焦皆柱截以節水也斯造物之巧以前民用  
公會其巧宣其用元猷秘策儒効相業以高視一世上追  
前古宜然者二子又惡得例論哉



沂山曾氏祠堂記

廟也者亡以致存也主以棲神廟以棲主備物以薦生之也  
 也祿有族食之象焉廟有制後世易以祠堂然祭及高祖  
 則始祖先祖皆無祭子孫服盡如同路人故世姓有始祖  
 之祀以昭族之合謂之族祠然傳敘俱祀而禮制踰宗子  
 不立而宗法亂予於世祠禮不足稽而義不足以起皆不  
 記沂山曾氏之祠禮與義近焉曾自團練使延世固始入  
 龍居龍潭桐城東里傳十四世少師從龍弟用虎知興化  
 人德之留其子承務敬仲于莆居之沂山傳四世而大  
 鍾壺居士繼補宗也五子時稱五龍聯珠伯龍西湖

為許白雲高弟尤眉白方業世其嗣姻家陳繼之禍作四  
 龍之後連及伯龍子矩齋幸脫於難時祠以就燬祀田亦  
 已就質遂因居為祠贖質田復之生太一太二太三以載  
 蕃曾氏正德癸酉太二玄孫烜燧當歲祀乎承痛先祠久  
 弊謀割金儲粟以為祠倡族之長佐房之長植杜群而和  
 之屬綱紀於燧燧遂割五金族共割八金累息二十金而  
 奇積粟百十石而奇經始于丁丑之春比戊寅祠以成告  
 一堂三室中鍾壺始祖也左矩齋先祖也右太一大宗祖  
 也別其旁二室左太二右太三小宗祖也五其主專之子  
 姓則名系于室之版不主不祀懼僭也小宗禮別祠別室



別祠意也力固儉無害神之依也冬至祭始祖先祖附大宗小宗亦附寓有裕之意始祖固專祠矣立春祭先祖始祖櫝小宗櫝大宗附寓重宗及昭穆之意先祖大宗始專祠矣小宗自祭其祖則諸主櫝寓各始其祖之意服雖盡而不遷小宗始專祠矣餘各祭于寢則祠有定祖祖有定祭族屬合而孝敬興禮曰傷哉貪也禮之權亦法之巧以各伸其情無嫌而義自見祀必宗子宗孫禮之經不可易也是所謂近近可記也然行以立本學以宣用無棄人無惰業章前光而垂來慶則固一定之經權無與焉曾共勉之

### 三峯記

岳鎮祀以侯國而望于天子郊與焉然相都畫邑考位以崇體勢亦取高且重以獨制群有自他銳而秀峭而莊高流亦取自寄若九峰五峰雙峰者上虞朱君朝章是類也三峰自天姥擘支魁特端整虞諸峰無敢抗君若時有所授開朗神秀以獨當三峰亭而對之僑寓于杭杭亦有三峰又停對之金焦北固疏河轄地又三峰又亭對之皆命名三峰移床孤坐雲物發祥表名引類搜竒檢勝盡收之神移意會夢覓之間亦勞矣然鼎立孤青流聞四遠山之靈不謂無德而寤寐乞靈亦不謂無感也三峰訪武夷溯九曲瞻拜晦翁之精舍夕景下墜迴憇真館三峰迨失焉



長壽縣志卷九  
凌晨孤往竟得諸隱屏右介拱立流矚隱若為翁獨有始  
兀兀自訟悔不偕九峰五峰雙峰接道論續緒聞為三峰  
前欠而以處高會博神交氣往容知不示我以約數公者  
三峰又一三峰矣記以俟

### 棠陵記

開化姑屬邑勢最昂峰岫雲矗土而阜阜而陵青陽應候  
海棠盛花故曰棠陵夫棠花之盛麗者或儼神仙或第十  
友好事常入題詠然惟名圃常有而丘陵不常有志有亦  
志盛也憲伯方君思道祖靖惠父坦菴物之卜新第焉群  
山面內諸水環嚮雲物發祥凝遠丹而映晴碧陵之勝於

是乎最思道因取號焉陵其不既遭矣乎夫鍾淑天地囿  
毓人物山與水會者也高明之為德行秀異之為問學尼  
丘啓聖三蘇出而眉山枯春陵紫陽九峯栗里說者以為  
得江山之勝思道假重棠陵棠陵亦假重思道僻一鄉而  
耀聞海內殆非偶然者思道出口成章伸紙落筆成文字  
不架構而體裁渾成天趣逸發君子謂敏流暢澄潤善善  
而賢賢德聲播聞遠邇和應友盡天下之名士君子謂達  
視官如寄不飾讓不鼓勢不謀聲名白雲在望灑灑然脫  
印綬去自稱逋吏君子謂孝且高竒哉思道容有計升落  
利鈍其間者哉棠陵觀物殆有見夫開落禪代之固然者



抑棠不自彰待思道而彰思道之蘊有非棠陵之所能發者記自盡畢功焉

蒲坂鄭祠增建記

鄭自三先生倡學南湖其後散處福唐潯陽鞏橋前後一埭露四世孫肇始徙桃源開寶間肇孫瑄率福清州萬言內附授都統帥血食其地六傳冲遠徙蒲坂族焉族有祠歲久祠圯十三世孫泰一以所居東廳事質為祠祀冲遠始遷也附以八世副使九世朝奉十世處士取族重置如田也坂去壺公木蘭伊邇有水田竹木乎利生業裕則事踈退然諸鄭後居殆然也十五世孫贈大理卿公城

之城徙而少司馬山齋岳生靈秘發祥以獨鄭乎冠予忘年讓地焉既進士懸結是祠嘉靖乙酉以直道謝本兵遂盡撤舊祠益私地深八尋廣五尋寢以安神堂以序族門屏綽楔位宜有嚴族居棋置而祠峙其中若大鎮之臨從衛壺山南拱沙溝新鑿之水環帶而前坂別一形勝稽諸物足占矣是後也費出于公伯氏尚義嶠偕涵偕泓乎佐力族胥助焉始事于嘉靖丙戌正月三閱月工以成告屬記于予夫欲營居室先立祠堂禮也而世室屋壞春秋譏之唐制三品三廟公獨先于祠以敦本而合族也敦本致孝也合族以致愛也有觀道焉氣節文章後先有耀冥冥



莫不致享而群從子姓相慕悅以聯美後觀蒲坂將昔日之南湖茲祠始矣

永春縣廟學新建記

國家設學以居群秀以拔賢斂才焉學學孔子也孔子曰我學不厭誨不倦其教博文約禮強志而篤行蓋升堂入室者七十人其最賢顏子之陋巷閔子之不仕季氏近世規規學舍之移以巽靈山川非孔子意永春溫陵隸邑殆南宋人文肇開繼以晦翁北山之指授先後尤拔者亦七十人留公正莊公夏其最顯者迨元頗失舊觀廟學亦例視為圯士民請遷令臨海柴侯鑣以時警也待之嘉靖甲

申又警大巡簡君霄檄諸道兵平之侯上賞士民復請遷侯曰學宮獻功之所武息文興時哉白督學邵君銳分巡曾君鵬暨守畫可擇地白馬山侯意若有所授既之師生同耆民同卜筮亦同左廟右學廡齋解舍凡卑者高狹者廣闕者以完度能授事徐文學衡監之侯揔之材若傭出舉義間輔以公之羸起乙酉歷歲週功以成告位序顯嚴見者胥悅師生具書圖假吾族英希元以劉生興來莆請記予老謝文事然蓋福碧坑祖蛻具在族固永民也人文之興其有愛乎哉永之學四徙矣興衰迭運數或有然者僖公泮學之脩魯人頌禱之詞曰在泮飲酒永錫難老繼



之以敬明德慎威儀廣德心化多士服淮夷永之頌禱無  
以復易也抑學新也尤在夫人之新士先志志先道道先  
學以必求聖者賢者為歸澡身浴德自新而新民致類成  
化以收有得士之用世道幸賴焉亦孔子徒也識之

素翁續集卷之九

素翁續集卷十

男達編輯 姪孫大黼校刊

碑碣表銘

明贈通議大夫都察院右副都御史樂軒姚公神道  
碑

嘉靖紀元贈禮部主事姚公樂軒以

尊號恩再贈都察院右副都御史於是子工部侍郎君謨  
謂俊曰先大夫邑東尚原之塋二十有八年承諾顯幽亦  
十年于此矣意者其皆有待也著令秩三品得立神道之  
碑請易如今姚於斯考世焉公諱墅字彥常別號樂軒姚



故慈谿望姓趙宋時正子九歲應鄉科竟之取解首以逝  
遺文不數數見見其賀黃文潔一啓與文潔譔正子誌銘  
徐肩吾謂尊信周程朱子之說正學剛志明白愈偉亦時  
之傑矣公去正子幾世祖處士公仕經父贈都憲菊軒公  
悌仍世爲隱母范氏贈淑人柔慈有慧子不舉女舉馬貢  
士圩暨公舉自徐氏視周而過曰兩膝在是公清姿高格  
隱然山澤之癯而宏放開朗興寄孤脫又煙波釣徒之風  
槩故廬低短庭祀鮮潔廳屏無疾呼呌怒之聲視膳視祭  
耆流之社會致腆貧而周致副外若有裕家間無宿儲連  
之積其不可了也道行偶得遺金伺其覺還之遺者欲半

曰君失君得何半先世有麥舟圖時出以見已志有戲者  
曰有圖無麥曰有圖終有麥意侍郎也侍郎秀特悟穎書  
過日記之終身落筆馳騁上下而卒歸於正公異之曰吾  
姚世德厚神童之學未施子姓仕未有顯起而大是兒也  
言之群眾人無避或易其言曰十年外取左証比舉于鄉  
遺以豸衣曰汝服此服弘治癸丑二月以疾終於家壽竟  
六十有五踰月侍郎進士報至公不及聞後之至皆不及  
見其不誠可悲矣夫公和而介言笑真率屬事無敢於苟  
讀書了其大義小學繙閱字昏者數四曰禔身應事道盡  
在此以自致菊軒范淑人自盡貢士授意侍郎率本諸此



也侍郎文武出等夷董學政節鉞西陲以樹有勳蹟竟服  
此服俸之餘鄉族待舉火以竟酬有麥之志三世錫命三  
都憲四淑人又孰意孫淶起狀頭職國史邁迹連美有今  
哉配胡淑人凝重簡遠輔蠶織以不為家之落落慈而有教  
姚之起均賴焉而稽諸事會譬諸河源其濫觴固在行而  
川宿而澤諸水並注播而九合而一姚有固然者斯所以  
慰也銘曰

姚始諸馮因墟命氏有察中起神童是似不須其實宰物  
留餘公迹云卷公行其書昏旦親側承顏悅志養豈不匱  
芳新時致匍匐襄事負土而墳形柴足繭指血毛旌有卜  
其昌落門掀赫于前斯苗于後斯獲

明贈朝列大夫南京大理寺右少卿後峯黃君墓碑

黃君伯固諱鞏號後峯嘉靖

聖天子入繼起除名為南京大理寺丞明年當入賀微疾  
犯暑以行至京師疾再作余偕鄭大理山齋夏文選良勝  
陳祠祭九川諸賢為延醫視藥時寓大理外直疾革宜移  
余曰移無生理與山齋為治具息絕之永光寺殯焉士夫  
群在吊者皆失聲武流禁旅下及輿皂市賈者流皆曰黃  
忠臣亡黃忠臣亡劉給諫世揚黃侍御國用疏于

上特贈大理右少卿與祭命有司助其葬事卹其家士夫



厚賻余屬子達族子汝儀為買田歲得二百斛食生賴焉  
嗚呼君何以得此于

上于亡夫人人哉方巡宣大巡榆林也國勢如一髮舉千  
鈞君方以母憂在疚忠憤自激有暴屍馬革之志服闋補  
武選郎中適南巡命下正墮宸濠反計君亟疏六事曰崇  
正學開言路正名號戒遊幸去小人建儲貳大畧言近者  
之遊為動之過願延故老以進聖學廣忠益以開壅蔽建  
儲嗣以植國本削去無謂名稱以昭大分而前者北巡西  
巡竭財毒衆至夫婦不相保茲復南巡恐奸雄伺釁變生  
于內則欲歸無路變生于外則望救無及願罷南巡撤行

宮散邊軍盡斥不御之女陰發宸濠錢寧劉朗叛謀又言  
江彬簸弄無人臣禮而賜以國姓封以伯爵付以提督京  
營外挾邊卒內擁兵權不亂不止忠憤所激有舉朝不敢  
言者自分必死具三書遺所知并布肇二弟屬其後事而  
收拾其遺文時陸駕部震見其疏切連名以進朝士響和  
疏者餘二百人

上大怒下之詔獄備極慘酷死挺下與除名左遷罰俸各  
如干人震亦尋死君屢絕復甦彬猶欲甘心變服由問道  
至濟寧問舟南下諸賢既得罪南巡之志遂阻未幾宸濠  
叛錢寧江彬反跡俱露而君之忠憤益彰



身系續集卷十  
四  
上知之故有是起君亦力取自副疏稽古正學敬天勤民  
法堯舜保全君子大禮當明所後之義昔齊景公樂遊海  
上下令言歸者死顏燭進諫君樂游海上儻有治國安得  
樂此海也遂歸果有謀不納者胡銓論秦檜和議之非詞  
嚴誼正朱晦翁謂與日月爭光君之疏殆過之可謂難矣  
黃出刺史岍之後君素有奇志家貧力學既進士節推德  
安主事刑部更兵部轉員外郎郎中廉不近名法謹而心  
近厚父大理丞公燦世蚤所至迎母鄭宜人就養成其二  
弟讓先業歸之性善記異書收錄之盡文類歐詩類唐有  
後峰集若干卷讀書錄山居筆記未成書鄉國來賢余尤

時周與君屬意嘗許君亡子孫女今皆不嗣然亦並以有  
聞假以年誰禦哉抑有不相易者配林氏封宜人與二副  
子不舉宜人一女舉馬適郡庠生李某後君布子某也年  
四十三嘉靖壬午九月九日以卒又某年某月某日某山  
以塋嗚呼余老以病尚任銘耶抑非余無足慰後峰之幽  
文役馬銘曰

九峰昂昂其下有鄉有發厥靈為龍為光星精嶽祥粵古  
誰似遂德壯猷式有文武貞方失位弱水在東孰是不回  
振其剛風烈膽健氣山移海立醜類蛇蟠族焉以赤大物  
載奠



身素純集卷十  
真主龍興汎滌叢苑基理太平首拔忠賢清我王路臣軌  
伊存物焉以故天日昏黑世短心長轉紉發晨式者斯傷

明琴川陳母譚太孺人墓碣

譚太孺人歸于陳贈御史復清公也舅氏木已拱姑猶虞  
淵之日復清好書史不事事太孺人獨手婦政復清不祿  
又獨手母政以教成二子察臺憲寰國史太孺人被有封  
命嘉靖壬午壽七十六而終祔復清虞山墓云銘曰

粵有令淑正方蹈醇奚作佳對內職是親門戶尋立遭家  
弗造首白為期於焉世蚤聲絕泪涸兩孤日前過庭誰詰  
積書誰傳學舍甫移伯仲聯起法從詞垣鳴珂有里載中

關令惟孝惟忠礪學砥行君子攸同浮態夕霞榮景朝露  
燁彼章服安此裙布從班載召並影聯飛不暮以浹凶問  
斯罹鯨鱷河流豺虎峽路疾濟哀奔惟母之故虞山蒼蒼  
虞水融融有玄斯宮有樂融融

明中憲大夫貴州按察司副使龍坡林公遜齋墓表

宣德丙辰貴州按察副使遜齋林公歿去之今正德辛巳  
八十有六載矣公外孫子某始追表其墓曰貞臣之墓夫  
振肅綱維扶掖名教狷狹自是則政是弗經解弛無羈則  
人罔時畏夫以廉頑立懦之風非砥節礪行之士鮮有副  
者公違凡運古秉義立方不浣自潔廉白稱焉不淬自剛



身素純其卷十  
表  
疆明著焉崇尚禮則稽校墳典家薰其德而鄉範其學起  
永樂乙未進士為按察僉事署之陝西憲駕臺符歷荒州  
而臨遠鎮時維貞吏亦乃勞臣私無敢干叛不可改燭直  
于枉而人絕寃稱舉易于布而邊免輸粟洮鞏之庾先發荒  
歲為之無飢兵衛之胃並收武流為之興學正色允在喜  
愠不形氣剛詞寡畏愛有加焉最績聞

天子特與誥遂憲副貴臬凜冰蘖之素以時發金石之貞  
聲先惠流威行徼外犬羊馴擾豺虎避箴焉而稟命不融  
英氣斯戢壽僅五十四僚吏傷感苗獠興嘆骸骨幾不能  
歸妻子幾不能為衣食數椽之古屋撐柱可念黃氏外祖

母公長女也嘗語某曰吾父在陝憐吾貧助以二帕手書  
尚在前輩風韻固然者同時臺憲公獨振響矣續郡志者  
以宦業例公殆未詳也公與某同源分流金紫光祿大夫  
悅公公後也諱時字學敏父贈奉政大夫按察僉事諱憲  
母余配宋繼王皆宜人子孫蟄蟄邑博純仲子邑尹世明  
曾孫也天不厭廉重有顯者某敢假昭潛之筆以續有道  
之碑

明中大夫左叅政姜公墓表

見素子曰風其不還矣夫夫樂園醜方附同畔異文勝而  
質木乎微斯朴畧所以絕觀斯人不被有醇厚之澤姜公



其猶行古之道也公諱昂恒頴字也上世扈南渡由汲入杭居蘇之崇明海上徙崑山既析太倉州為其州人惠安其居里也高祖諱仲和海運千戶三傳至公父贈監察御史諱顥世蚤公賴母曹太孺人以鞠以教厭俗浮靡沉晦以收之於寂學主造詣不驚取章句第進士出知棗強入為監察御史自北乞南知河南郡又乞寧波皆以母老故竟去終其養服闋薦起福建左參政以疾辭竟卒公義利界畛不納餽亦不修餽媵舊過客澹若無情試禮部承費之乏至婦家猶力為卻子弟上書不用官紙在臺諫劾李致省邪術忤

憲廟肯杖之於朝清理八閩戎政梳櫛蔽隱為守令立綱要以不牽小行寅察預落華飾吏易故臣家毋干官常兩爭師聽徐折以一言而定親藩監舶無假日本夷之使為之歛屈殆有以動之於先者矣居常專志民隱灑之石梁四明溪之堰起其敗以馴其勢歲儲例郡而歛省而散出時不當所入公請歛散皆由郡兵民稱以為平視事甫已卽閉關閱書草生於庭鳩巢于樑雀集于案而飲其硯水夫治絲無焚烹鮮無擾綏則安動之則苦人情也簡以臨教以化斯循吏所難公優舉之而賦命弗永望耆而逝謂之何哉嗚呼求公於人觀於身求公於官觀於家郡志



具素純身卷一  
稱仁孝恬退一介不苟取與家計索然有古君子之風可謂實錄公與余並時臺省公北余北公南余南中各有所寄而幽明不負可謂良友公配淑人某氏二子龍某孫某其曾孫某其龍為雲南按察副使請表郡城官山之墓噫交遊落落非余表誰耶表曰明古君子中大夫左叅政姜公恒頰之墓

明封順天府推官林公遲菴墓表

公諱耀字彌宣以字行以遲于遇也遲名其菴方孩孺大耳秀眉睛漆若肌理瑩然玉雪里人曰林有異人茲其復出矣父潛夫翁意謂然母王氏意亦謂然比長修榦豐頰

聲應節如諧絃禮度坦坦不崖角防畛以居於異與之處久而身量若蕪容而其中要不可犯與洪安人相敬如賓洪名善相理內紀其政第精樞豐儉之節以食其尊嫜暨其儕行以下逮其臧獲公輸私祀慶吊有常儀公得以專志於學日坐環翠樓左右圖史吾伊無絕聲父與王異之王卒繼母龔又異之公亦母事無間龔疾當灼艾身試灼以薄其痛龔感心動疾為之愈龔所生弟業已分請易其業公許易業洪無難色子垠塾孫富書課公舉其大屬洪稽其細洪稽無漏正訛警惰居然女師故學皆有成而公遭迴郡序歲以久僅以貢為廣之清遠訓導居五年以龔



身素純真卷一  
九  
訃歸無復有仕進之意精力一盡于學溫裕之業以官而  
貧倫輩屬望重有所不滿公心神怡曠未嘗有湮鬱邑幽  
之懷情事一付于酒與伯兄寺丞翁歲時相酬酢群子姓  
侍側公豪飲大醉瞪視良熟曰吾塾也可又謂垠曰汝富  
也可吾學吾兄汝垠學汝伯瀝酒在地為笑寺丞堪太僕  
時所封公封順天推官與垠之封大理評事也同日命人  
以為難同時一門三封官三郎署七 贈封安人孺人人  
又以為難九牧端州為盛人

皇明進士十一人及第二人公祖孫四進士祖終儋州同  
知諱洪堪曲靖知府塾富同年進士塾南京考功郎中富

寧波知府位望並振發公仁慈泛愛與洪故相將為厚質  
易廉取浮酬有所求無計羸縮強以應於家時無丈物所  
友陳伯同歸女借洪珠環直可百金既為婿家所執力不  
得償公竟不責償洪亦無有私憾其宅心處事類如此故  
疾必禱哭必哀盡頌遺德者過時而悲公與洪生同宣德  
壬子正德丙寅年七十五以卒洪卒成化丙午先二十年  
云孫曾與玄宓宏萬仞萬里繼祖四明金蘭茁玉立可知  
其世石泉之藏宮傳屠元勳誌之矣其族後行友一門善  
惡可無表嗚呼物不可以終速故受以遲大所由以基也  
天之報施弗爽而亦甚遼緩要不在其身者衆矣福夫狹



身家續錄卷十  
子寸功薄善報預施先噫祇見其小也樹穀者責一年樹  
林木者責十年之後德則百年焉遲菴及身見之

明贈文林郎監察御史崑山周公明軒墓表

贈監察御史周公諱暉字應南別號明軒金塘收宇圩之  
塋三十有二年配贈孺人李氏之祔亦故矣子浙江按察  
僉事君震請表其墓崑山之周自湖州來徙壽誼翁百一  
十有六歲

太祖高皇帝徵入顧問賜綿帛肴醴護歸其鄉魏察政祀  
知蘇州鄉飲大賓禮致即次乞言王太史彝紀其盛傳諱  
勝諱顯諱岐襲隱俱壽余紀世壽傳公從沈空同周草庭

業士有能詩聲授徒里塾病口食弗繼行市中見權量物  
估往往用裕曰彼固利而為吾士而舉義無害輟其業業  
焉臆計懸合富商巨賈必估乃馱取固約酬其利之當則  
泛李孺人又善粒累久之事育給賓祀副三族知舊間資  
其布粟藥餌之繼棺槨之給厚者至數金尤厚一人鎡金  
尤厚一人倍鎡尤厚一甥納之室而謀其立公既裕謝所  
易業又士乎歸謂震曰吾居貧廢士汝其承之震受命惟  
謹以決取進士為名御史公與李被有後命震之婦高亦  
封孺人公三子三女五孫四孫女其卒弘治壬子壽五十  
九李卒丁巳壽六十六嗚呼四民之業士先焉商致抑末



之微然三事八政正德厚生乎等太公立國張安世立家用此也子貢學夫子之道而好廢然則士與商通歟曰士以明道祿殆非所求食貨交相為用末業貧者資也商之利厚於農工而居中應會估不二價非士莫之能舉也公積能散業能謝士未盡然者抑計然陶朱之術非歟表曰贈文林郎監察御史崑山周公明軒之墓

明琴川處士陳清隱公墓表

琴川處士虞山祝家峰之墓六十有九年孫察既為監察御史請表其墓前二十年察方以進士節推南昌余擇賢署州副焉為御史方貞敢言動引古義相悉以為知己表

祖懿為宜陳故海虞望家上世伯暘至繼芳四世傳處士處士傳贈御史復清仍襲仁厚稱長者處士沉默簡亮甫冠承父區賦公無負租戶稱其平新廟學起梁道力先公匱而不計其償姻黨周恤至棺槨為預處士涂遺骼為收瘞所居邑治之陽一筠簾自隔群喧為竅又厭夫藏之未深行一徑若幽谷然轉而樓以出風氣臨雲水閱古書而王之於靜為佳子弟良父兄晚歲鄉望隆重為太平逸民邑大夫鄉飲大賓必禮致曲直請質片詞開解負者唯唯避去垂絕之訓曰善必可為登諸誌石者如此諱璇字秣維市南清隱心遠地偏之寓見志也玉蘊石珠而藏諸淵



身素續集卷十  
光怪殆不可泯處士之素尤氏諧德之輔道有相成者而  
詩之蝨斯頗戾既古稀子穀乎喪幾若教氏之鬼而枯楊  
生梯戴氏尋舉稷為宗祊之慰稷復清翁也景泰甲子處  
士七十九而終復清時方九齡就木猶有遺寄容知有察  
寰二孫鸞鵠峙起進士以聯綴從班善道文周二曾孫  
子梧稚竹中棟群蜂之瑞殆兆諸斯蜂芳音為近蜂有君  
臣禮棟廟堂象也蜂而垂殆垂方之應棟而會又殆亨會  
之祥處士太丘之陳其未可知二方無得優劣獨慨夫處  
士之前太丘或斲而太丘之後抑諸孫之所未擬表以並  
告云

明贈文林郎監察御史鄭公竹泉墓表

生才以出其用秘不自施以食于其子於鄭見竹泉公焉  
諱胄字思夔鄭自露倡學南湖四世兵曹阜成棗梓龍坡  
仕籍聯世自堅及忠獨襲為隱興宗官終教授公高曾祖  
也父諱克脩母方氏教授濬源公女公九歲稱孤慧穎天  
出方矢志督教以無煩塾師比長脩鬚躉貌類北人人厚  
待之公亦奇傑自許旁涉詩畫不局局一詩既獨守家政  
猶名士相麗澤曰山林自我廊廟自公後雖地異而友誼  
如故配方孺人訓導璿女門閥似而性習不殊相安儉質  
相力劑和尊事下育織巨隨應周視其洪氏寡姊終身間



身素純集卷十  
承宰里斂則而供常先質枉直迎刃而決子光瑛學成甚  
蚤孺人曰終鮮兄弟請納江舉光瑛光琬弘治壬子公哭  
方過毀竟卒孺人哭公亦毀亦卒公壽五十九孺人如其  
二焉仁山既葬光琬薦遂收積官監察御史公贈如其官  
方與江皆<sup>曰</sup>孺人余素愛光瑛又愛其子天壽並器之光  
瑛竟弗收天壽收以復落又與光瑛俱弗壽豈鍾諸侍御  
者獨隆今進奉議大夫湖南按察僉事賢問特起子某天  
壽子某某孫曾蘭立公衍盛未艾表以待云爾

明贈承德郎刑部主事質庵王君墓表

君諱瑄字玉和王姓質庵其號咸通間兵部侍郎漢固始

入閩居芝山假令新縣今長樂也九傳宣教現徙莆之國  
清塘下又九傳發隨母吳避地錦園遂襲吳姓三傳處士  
文傑傳贈太常博士諱禮君大父父也母林封太孺人博  
士世蚤太孺人鞠有諸孤家為落謂伯氏玉伯曰汝商仲  
玉榮曰汝士君及季玉其治蠱伯俠遊湖南君求之三年  
乃共歸時仲學未成君外償伯負內給仲學暇則為錄奇  
書夜相疾讀少懈曰家待仲立何懈仲竟取進士為南京  
太常博士監察御史太孺人老令分異君獨無所私又之  
凡澆欲腴狹欲廣弗協欲協皆曲為之副伯氏屏子育私  
弟怒釋引而還延師教群子弟樂賢泛愛里稱善人生正



身素續集卷十  
表  
西  
繞壬戌去正德己巳壽六十八配定庄林氏有婦行生同年弘治辛酉壽六十先卒子男七鳳翔澤鳳儀佐偁儼鳳靈孫大受大勲一貫女二與澤皆林出餘副戴出正德丙子鳳儀鳳靈同舉于鄉明年鳳靈第進士授刑部主事疏復王姓歸葬君與林後山之和公室若宿預云又三年鳳儀授亳州學正澤聰選官嘉靖

尊號恩君贈如鳳靈階承德郎刑部主事林贈安人戴封太安人鳳靈才猷宣茂歷員外郎郎中年始仕為襄陽知府可占其至以受愛厚于余請表墓道之石嗚呼相猶禍禮遜之風以微故族舊門行義孝友亦多失其故質庵

後錦園而起者表曰是為贈刑部主事王君質庵之墓

明贈太子少保進資德大夫正治上卿致南京工部

尚書事林公竹田墓誌銘

閩之林類出晉安郡王祿入莆始祖也竹田公長樂之林元季莆寧真始徙族益親成化丁酉公同省薦會益密墓銘生故有屬及是孤玉汝靖請卒銘為副嗚呼其可已乎公諱廷選字舜舉竹田其號五世祖萬原子昊贅築堤之樊生光榮傳岩耕諱汶祖也梅隱諱宗理父也皆從樊姓至公為御史奏復為林累贈祖并父資政大夫都察院右副都御史祖妣妣鄭配陳皆夫人公神采克蔚而體格



微短喪父蚤圖母乎養乙科安之為部史堂稿所遺登正  
又遺鄒宗伯曰賢自大器公亦默悟辛丑第進士節推蘇  
州蘇多訟又當南北要衝貴客舟銜尾而至公綽有餘辨  
陸士能者婦誤殺人以當士能繫之之一夕夢有告曰林  
尚書來乃白公來遂白意樊為近不知竟林乎復也屬邑  
鄧珙終訟連逮數百人訊久不服公訊輒服時王端毅公  
為巡撫賞歎文人桀悅賦青天謠以訟弘治戊申部以才  
堪風憲取公有母之喪服闋授監察御史巡按廣西寇犯  
永安府江道梗公相畫參謀預奏竒捷有俸級金幣之賜  
為僉事為副使浙江憲政優舉溫處鑛徒聽歸農無問賢

能時旌以特當南臺會薦自是歷深望隆按察使廣東左  
右布政使江浙大理卿南京右都御史兩廣不數歲荐陟  
大僚身軍務巡撫重寄公沉毅闇朗不盡察不眩能不忘  
才不事紛更而籌量懸合大政處以暇豫尤善遠禍無格  
釁廣方敝誅求盜賊充斥公一意招撫梗令方授以征猶  
申戒濫殺前後擒斬二萬三千有竒 聖書八獎勵四厚  
賜公連五疏乞休俱荷 慰留有多効勤勞才望素著之  
褒公前考御史受 勅茲受誥台石之封甘露灑灑公有  
南京工部尚書之轉引疾卧家又疏三乞  
武廟始俞允 聖書褒與有歲夫月米之錫是時年六十五



會城三尚書二都憲續耆英之會今

上更元進資德大夫正治上卿公既卜魁輔猶建築堤祖祠祭田以承時祀義田以周族屬始營妙峰壽丘陳夫人先卒祔焉男長玉汝恩生婦王司空女與三女皆夫人出次玉潛中殤副任出季女王出婿皆宦家孫宜杭孫女二公卒嘉靖丙戌二月七日壽七十七良賤悲感遠邇具文以祭巡按監察御史楊君某以聞

上特贈太子少保賜葬祭噫榮矣公好賢念故而心常近厚同年陳主事義舟過廣陵夫婦俱歿為經紀其棺謀其葬之事鄭少司馬山齋為逆濠構禍紆道營救携挈其妻

子以還嗚呼是無急義遺意指天日出肺肝利害若不相識何人哉公葬某月某日遺懿狀神道碑詳焉銘曰

閩越和會降茲偉人秘以弗有儲精萃神口碑流聞時維宣靖布公開誠雪冤平政臺綱有肅外朗中開盤錯迎解有倍其才一歲累遷授鉞其柄

帝曰南夷汝往以靜犬羊要束畫土而氓有弗用靈我師以征大捷屢登骸骨連請勞臣伊念邕桂猶警司空引疾三疏載聞 綸書報可海嶼沙村依依水雲涉世微倦卹恩縵稠盼嚮斯見坤靈洞燭有闕玄堂公德在人公裔之昌



明封太淑人邵母過氏墓誌銘

邵先生二泉寶文與行皆脫凡格就平粹以獨居範型為世儒碩余意屈心往又以知太淑人之賢有父道焉太淑人過姓宋宗室徐王郡馬孟玉之後邵過世隱門邵容春叔安望實自副友倪元鎮王孟端名名士傳存一翁又傳三益純和二翁並贈通議大夫副都御史純和諱溥二泉父也淑人為時明翁季女年十九歸純和五年純和卒存一又卒二泉始三歲未幾楊氏太姑又卒淑人鞠于多難援曾從太姑以保孤幼邵之遺獨書乎在皮為之留二泉既就學一燈共命既納顧淑人產盡而簪珥亦去薦京闈

取進士知許州歷有都憲淑人養官所者二十有七年公無與聞而義取默替兩之禱二泉齋淑人亦齋前牧母之喪括歲俸以酬秘具猶置將承貳僚淑人曰吾為汝節孝廟詔毀淫祠與老佛之居二泉奉惟謹間求泚人為右無右江泉泚人誕之旦女賓請賀曰母賀華氏孫婿迎婦請舉樂曰母舉樂日遣小隸市一肉一菜是外門禁肅然淮陽二泉忤逆瑾意勒致仕尋起貴州道轉戶侍淑人倦于偕二泉終養乎乞入京又乞來寧又乞

許焉尚書禮部而南淑人已未疾二泉終養又乞上入趣視事二泉辭又乞 詔有司以禮存問以昭異數



嘉靖壬午壽八十一二泉謝未舉子淑人曰一玄也後告  
 祠堂而乳焉自是時致膝間曰吾邵脈也昌其是兒疾劇  
 命出故篋以分遺諸孫又劇屬二泉無毀屬顧一玄乎視  
 臆月十二日也後事顧預有相約家眾第吊客以無煩二  
 泉復冉涇也顧尤力焉

尊號恩泝人例進尚書太夫人命誥葬祭例卹典二泉皆  
 引自避君子謂廉晦可風抑有授以然墓在惠山繡嶺去  
 純和百步者三義重遷製棺衣而合焉癸未十月丁酉葬  
 得日走狀屬銘嗚呼節與慈女婦之極邵所謂大也瀧岡  
 阡表之諭母殆然二泉固六一似也泝人一女二孫俱殤

一玄命後者也三孫女義階華珉學籍吳汝憲秦汶其婿  
 嗚呼物忌于完尚書固錫類為慰者也銘曰

維邵之息不流以堙脈而出之儲精發神維邵之遺于茲  
 以有維孤也恃維命之守維昔罔諒有落舊門綸書玉語  
 益焉春温司會孔棘有收若寂言賦閒居偕雛晨夕得焉  
 弗居造物留餘有新也後神駒赤騶冥默斯定善積維遠  
 韋蚌雙遺其出也晚柔規懿式申國是同繡嶺蘊隆有玉  
 在中

明封承德郎南太僕丞同四品服虛菴林公暨配張  
 安人墓誌銘



渾樸散量長較大至販鬻松檟猶門第矜高吾族虛菴公獨出凡格林九牧世裔公大父儋州公

國朝進士最先大母鄭安人累貲最厚至公退若編氓念父潛夫翁久痿不竟垂成之學積羸承匱以先義凡公私立有群弟為母王繼襲之慰孝友名遂字家族宗巡按彙訪隱行書旌善亭為勸子曲靖知府堪姪浙藩參議塾姪孫廣藩布政富先後取進士公以曲靖先恩封承德郎南京太僕寺丞配張封安人再加同四品服仲氏司訓彌宣公封順天京推其子垠封大理評事同日封拜與公凡三封官一郡守兩朝銜六命婦公獨婦慶前人申撝謙後人

之戒城府不見其跡者二十餘年歲時家燕子姓幾百人進一觴為盡京推醉曰弟醉赴飲蹙躄而還曰弟又醉扶以入服襲之喪者猶致毀馮棺半舍以葬諱焜字彌實虛菴號也安人橫塘遵信翁女柔順無專睦召肥祭必備物分家衆下上衣食以自取効至老猶績無厭曰兒官貧兒官貧居常對子姓道洪熙宣德時事歷歷如掌曰後日求老人言不可得孫應聰喪母以鞠以教以繼取進士為主事及見曲靖之

溫旨存問應聰婦黃安人之封典以高年再膺肉帛之賜皆世所稀先正德丁卯公壽八十一終葬景祥前山之原



身素純真卷一  
金  
繼是安人終嘉靖癸未壽九十九與曲靖望八之孝子尤  
世曠見子即曲靖中憲大夫知府娶朱贈恭人培義官娶  
鄭女適廖奇逢劉本光黃紹禹孫貴瀛應聰應濟應武玉  
曾孫琥昌亘杲昂曉孫女曾孫女凡八公之葬其嘗任銘  
及是以安人合併誌焉銘曰

維行獨于彼空谷維德門振振子孫維壽百有翁斯敵維  
佳城景山與京

明國子生華君名配張孺人墓誌銘

癸未秋之仲無錫華時禎有妻之喪先是吾友邵尚書泉  
翁喪母太夫人余過錫吊焉翁以從子璣及二婿來謝因

致時禎求銘之意余曰翁冢刻遍海內顧屬于我三生曰  
翁制中例謝張孺人父中順福州公時敏辱舊于公其哀  
雲又辱考功乎舊通家乞靈假翁致重爾矣時雲柴瘠面  
墨杖而致狀聲嗚嗚不續余悲之孺人以哭母王宜人致  
毀竟逝余又憐之翁之意其焉可負也辭其幣誌焉華賢  
高好禮自曾祖而下諱荃以孝友聞諱本盛善施稱長者  
坦菴諱棟試有司九弗利貢而謝為隱人以為高坦菴與  
福州髻稚同筆硯謔言締好而時禎孺人物同比長坦菴  
請婦福州曰吾挈家之官吳外母老無托請甥乎館遂館  
孺人娟朗靜秀賓敬自將挽拽以共居於約數歲華裕益



增張之嗇為起弟珪陳氏婦之逆盛氏妹之歸吳存歿賴  
焉珪豪交而泛曰父官也貧語陳婦為節而相焉時禎雖  
館于張猶意若有繫孺人曰無舅姑之思請構石涇迎致  
焉于是孺人之父母得安于官時禎之父母亦安子婦之  
在其側也福州既過家故業新拓籍記了了謹奉以還而  
自請歸華福州不可孺人曰舅姑乎在割以田留需為祭  
奉二親鐵岸之第以自盡子婦始終之情杜斯干相猶之  
罅請時禎立二副室以圖享昌愛雲而教無靳遂文事知  
名與父後先畢業南雍待選選部以須有遠至福州喪既  
期猶哀曰贅殆室等吾從其厚福州之後為落時請繼孺  
人曰汝請汝父及是王宜人喪重以致殞勢亟屬雲學  
屬楊氏婦內政屬時禎與雲二女之念曰秦媾疾子殤吳  
則庶庶亦女也一居之厚舉手訣時禎訣雲遂瞑嘉靖癸  
未八月二十一日也以上去天順甲申壽週一甲子明年  
某月某日時禎營某山某位以葬嗚呼孺人殆丈夫而女  
於張蠱之初六承考於華家人之六二順以巽終吉貞吉  
者也母喪傷毀禮未稽孝足念也銘曰  
矯矯翔鴈言顧其雌亦有飛燕並羽差池胡獨弗似遺情  
酸悲昔行其野耨盍在下案舉無期孰炊有化虛幌宵寐  
復真神遊同歸以盡有賁斯丘



身素純身卷一  
金  
明贈奉議大夫光祿寺少卿水南馬君翠峰墓誌銘  
正德己卯六月十有三日宸濠反江西都御史孫公燧按  
察副使許君達死之吾鄉南京戶部主事馬君思聰以督  
餉至被執不食六日死叅議黃君宥亦死江西士民殯之  
僧寺八月十有六日濠平六日二子明竒自莆至明衡自  
南太常至啓殯易衣冠以殮又得所奉  
勅于行部承塵秘處事

聞有贈有祭馬君贈奉議大夫光祿少卿並祀忠節祠巡  
按監察御史唐君龍疏于 朝又立四忠碑以紀嗚呼守  
臣死封疆固也使臣不幸而入其執死亦固也君義不為

子陵為子卿亦不可得也夫死非難處死為難龍逢比干  
夷齊死一也而餓尤從容君子於四公之死無異論者君  
字懋聞翠峰其號馬迤北衛州人仕宋為帳前撥發南渡  
秦州之馬鄉司巷居焉七傳為昭二子並官判院顯東馬  
裕西馬裕三傳良成為蒲縣尉因居水南又三傳為豐豐  
生洪源君祖父父也妣方氏君清穎蚤慧學知向趨事父  
母盡孝讀冠萊公六悔足曰親在不知孝兄在不知敬悔  
作心圖言志詩自見家貧納室之期已晚而祖父母喪未  
葬請先葬慕劉孝子閔方格時從觀禮弘治乙丑第進士  
歷知象山平鄉究心民隱求病利而罷施之早澇虎患為



禱民知有應亦知有令之誠其最大復柄要所侵河渠辯  
逆瑾偽校寘之法流賊熾盡地分民環堵並築浹旬而城  
告成誓與民守賊無敢犯屬之民與鄰邑逃難之民賴若  
更生竟以擅役左判海州用陶巡撫薦復知諸暨政不易  
常而縛其鎮守狐倚私人為民戾者既入為主事以有今  
之死夷坦有讓吾不知其勇也在諸生開館授徒遠邇畢  
聚嘗曰讀書能沉潛咀嚼胸中自一部全書材成黃少廷  
尉輩周憲使宣黃郡伯希英周會魁大謨尤知名又謂明  
衡曰人心本是活物常令存存不息如化工生物何事不  
可為明衡果留意孤尚從吾友新建伯陽明公遊取進士  
為南京太常博士選監察御史未踰月與朱御史淞以言  
落民士論躋之嗚呼君素先定而道又行于予矣生天順  
壬午二月壽五十八配涵江鄭氏封安人女一藍信其婿  
孫知立知讓孫女三俱幼某山之墓既卜二子以少廷尉  
狀請銘予往還京師奪于冗于老以病文例辭翠峰之死  
余重明衡余愛也銘曰  
成之易有開則先遇之晚有兒則傳毅狀剛態于彼金鐵  
吁嗟翠峰之死為烈

明旌義三山郭公恪齋墓誌銘

正德丁丑進士例歸省吾閩郭澄卿歸省偕同志左授諸



賢為社詩致我雲莊嗣是會若宿契比使及門則澄卿致  
事狀請銘尊府恪齋之墓噫榕城寓次神宇克蔚銘耶公  
終嘉靖丙戌六月三日壽六十九諱軒字瞻夫郭自元宣  
義貴江右入閩一再居南街教諭崇傳福福傳嶽仕績隱  
行照世有聞嶽尤負雜博善施與焚逋券德在人為多生  
戶部公珙恪齋父也母吳氏公貌古性夷絕稚習戶部異  
之授以易禮知音要史子獵涉道古今事可聽戶部既進  
士尹會稽尹嘉禾人為主事所至挈公自隨而自盡父之  
孝官之廉默輔焉承考用譽陳孺人又善為肥家尋舉有  
戶部安人之喪飾後事散遺財獨襄大事三易壤不以相

猶成從父弟麟尹有奇跡教波嗣響家學與越坡平嵩榕  
江稱才子弟進士長長川迎公就養屬無及見其面一饌  
之新必問所從悼二親弗逮筋為廢波治有殊績猶以剛  
為戒竟之為民求節觸璫忿欲椎之民群護以脫時水部  
主事命已下猶坐撫摺下詔獄責慕江藩風望大振公虞  
禍書速就官久之承委校書得拜床下公宿疾為間間復  
亟波以藥進舉目曰命也遂絕公冲晦有遠量學既中輟  
猶文事自娛祀先飾躬課子流惠鄉族動多可書而賜服  
僅酬錫章未逮後之收理然也公兩配俱陳男二澄卿即  
波婦余湖郡庠生婦謝先陳出繼出二女陳儼王夔伯其



婿墓在某山之原某向某月某甲子窆公于左虛右預繼先陳祔姑吳保新墓云銘曰

世之綿維德先引以大曰有年栢松刺地看參天維郭初仕與隱卑彌尊戢以謹善積慶餘文誰領震之武慶之風前作後述將無同道路不語時乃翁

明朝列大夫浙江布政使司右叅議石泉林君墓誌

銘

弘治壬戌族翠庭石泉省吾凡三第進士皆廉實才望為時令人翠庭為察使石泉為藩少叅省吾為大叅穹階屬之矣石泉年五十四顧疾以卒貧無棺僚長何道亨為具

棺無為斂為之具斂邵提學思抑為之狀而以余誌銘石泉有幼慧植志甚勇父遲菴公彌宣司教清遠歸以落也責起落良勤石泉省吾既並起石泉封遲菴如京推省吾封槐庭如廷評父子祖孫同日封拜盛矣順天應天柄右充斥殺以五方民不可爬理石泉兩推京政風令稜稜疏重根本因事納忠治理尤精切考功南署有所殿最虛不容物隱然衡石之重其視浙藩也盟神外復有所告刻錢戒布之學宮分守別出新格不吏隨不勤館人日市一菜把羹于是豆亦於是人稱菜林袍服手記獄案公移手稿手批荅以明示無它取畏信于下上立孤取忌其亦焉可



齊也其卒正德乙卯六月十又三日諱孰字從學號秋旦  
葬遲菴也夢石泉符更號石泉母洪氏贈安人配方氏封  
安人方爲通判東軒公孫順謹善相以共歷艱難數歲而  
免於瘠以上致脩隨繼酒漿時其裘葛以無難石泉購書  
之費遲菴曰賢洪曰賢石泉藉手內政榮境甫適而傷往  
至年僅四十一繼張僅二十七子宓娶陳女張出也尚幼  
孫繼祖所著石泉稿林氏族譜藏于家續名臣錄革除錄  
刻焉嗚呼士有遺用者蓋亦多矣獨石泉然哉余固哀其  
志也石泉獨乎哉昔裴俠守河北食惟菜鹽稱獨立使吾  
家中允守鬱林也稱青菜林古固有然抑有所授也石門  
白冲位壬向丙者墓正德辛巳臘月六日石泉乎葬方乎  
祔安之也張塋石泉潭坑位申而寅向銘曰  
奔流絕防弱水弗東爲獨爲同有樹其風稽天一力矯亦  
奚失鬱州允式嗣廼斯日有闕玄堂築于吉岡旦復旦也  
于夜之長



